

**Convenio entre a Consellería de Cultura, Educación e Ordenación Universitaria e a Fundación Universidade da Coruña (FUAC) para a colaboración no desenvolvemento de proxectos de formación profesional dual e o apoio aos programas de bolsas para os/as titulados/as en formación profesional, en ensinanzas artísticas e en ensinanzas deportivas**

Santiago de Compostela, 30 de xuño de dous mil catorce

**REUNIDOS**

Dunha parte, don Jesús Vázquez Abad, conselleiro de Cultura, Educación e Ordenación Universitaria da Xunta de Galicia, en representación desta consellería, e de conformidade coas atribucións conferidas no artigo 34.1 da Lei 1/1983, do 22 de febreiro, de normas reguladoras da Xunta de Galicia e da súa Presidencia e nos Decretos 235/2012, do 5 de decembro, polo que se fixa a estrutura orgánica da Vicepresidencia e das consellerías da Xunta de Galicia e 4/2013, do 10 de xaneiro, polo que se establece a estrutura orgánica da de Cultura, Educación e Ordenación Universitaria.

E doutra, don Jose M<sup>a</sup> Barja Pérez, presidente do padroado da Fundación Universidade da Coruña, como representante legal de mesma, e nomeado en sesión do Padroado da Fundación, celebrada o 18 de novembro de 2004, en virtude do disposto nos estatutos da dita entidade.

Interveñen en función dos seus respectivos cargos e no exercicio das facultades que para convir, en nome das entidades que representan, teñen conferidas,

**EXPOÑEN**

1º. Que segundo o Decreto 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria, a Dirección Xeral de Educación, Formación Profesional e Innovación Educativa é o órgano encargado da xestión das competencias e funcións que se lle atribúen á Xunta de Galicia en materia de ordenación do ensino regrado en toda a súa extensión, niveis e graos, modalidades e



especialidades, e entre elas a ordenación e coordinación dos servizos de orientación educativa e profesional no sistema educativo non universitario.

2º. Que a Lei orgánica 2/2006, do 3 de maio, de educación, determina no artigo 39 que a formación profesional no sistema educativo ten por finalidade preparar o alumnado para a actividade nun campo profesional e facilitar a súa adaptación ás modificacións laborais que poidan producirse ao longo da súa vida, así como contribuír ao seu desenvolvemento persoal e ao exercicio dunha cidadanía democrática.

3º. Que a Lei orgánica 5/2002, do 19 de xuño, das cualificacións e da formación profesional, especifica nos artigos 6 e 11.3 que a colaboración das empresas no desenvolvemento do Sistema Nacional de Cualificacións e Formación Profesional se desenvolverá, entre outros ámbitos, mediante a súa participación na formación do alumnado nos centros de traballo, favorecendo a realización de prácticas profesionais dos alumnos e das alumnas nas empresas e noutras entidades, e deberán establecerse os mecanismos axeitados para que a formación que reciba financiamento público poida ofrecerse por centros ou directamente polas empresas, mediante concertos, convenios, subvencións ou outros procedementos.

4º. Que a disposición adicional segunda do Decreto 114/2010, do 1 de xullo, polo que se establece a ordenación xeral da formación profesional do sistema educativo de Galicia determina que a consellería con competencias en materia de educación promoverá a colaboración coas empresas e entidades empresarias e, en particular, coas máis implicadas en sectores clave da economía galega e as relacionadas cos sectores emerxentes. Esta colaboración ten como finalidade, entre outras, a posibilidade de impartir módulos profesionais incluídos en títulos de formación profesional nas instalacións das empresas, co fin de garantir que a formación se realice cos equipamentos máis actuais, así como a actualización profesional. Esta colaboración formalizarase mediante convenio.

5º. Que o Real decreto 1529/2012, do 8 de novembro, polo que se desenvolve o contrato para a formación e a aprendizaxe e se establecen as bases da formación profesional dual, pretende crear as bases para a implantación progresiva da formación profesional dual en España, entendida como o conxunto de accións e iniciativas formativas que teñen por obxecto a cualificación profesional das persoas, combinando os procesos de ensino e aprendizaxe

na empresa e no centro de formación, propiciando unha participación máis activa da empresa no propio proceso formativo do alumnado e, daquela, permitir que estas coñezan de xeito máis próximo a formación que reciben, cada vez máis adaptada ás demandas dos sectores produtivos e ás necesidades específicas das empresas. Neste sentido, a empresa e o centro de formación profesional estreitan os seus vínculos, unen esforzos e favorecen unha maior inserción do alumnado no mundo laboral durante o período de formación.

Así mesmo, establece que terán a consideración de formación profesional dual os proxectos desenvolvidos no ámbito do sistema educativo, coa coparticipación dos centros educativos e das empresas, cando non medie un contrato para a formación e a aprendizaxe. Estes proxectos formalizaranse a través dun convenio de colaboración entre a Consellería de Cultura, Educación e Ordenación Universitaria e a empresa colaboradora, e empregarase un réxime de bolsas.

6°. Que a Fundación Universidade da Coruña (FUAC), constituíuse por escritura pública o 24 de marzo de 1997, é unha organización non lucrativa vinculada á universidade, incluída na denominación de fundación universidade - empresa, tal e como demostra a composición do padroado, o obxecto social e os fins fundacionais establecidos nos estatutos.

Inscrita no Rexistro de Fundacións da Xunta de Galicia co número 183, ten entre os seus patróns entidades públicas ou privadas, agrupacións, cámaras de comercio e confederacións empresariais asinantes da súa carta fundacional. Entre os seus membros, a FUAC conta con numerosas empresas e entidades empresariais de todos os sectores da economía galega, entre elas dos sectores clave da economía e referidas a sectores emerxentes para a economía galega.

7°. Asemade, a FUAC ten como fin ou misión promover o desenvolvemento da Universidade da Coruña e as súas relacións coa sociedade; así o recolle o artigo 1 dos seus estatutos, nel indícase claramente o motivo polo cal foi creada e a súa misión do seguinte xeito: coa denominación de Fundación Universidade da Coruña (FUAC) constitúese unha fundación privada de carácter benéfico-docente para a promoción, desenvolvemento e financiamento das actividades propias da Universidade da Coruña, e as súas relacións coa sociedade, con especial incidencia nos campus universitarios de A Coruña e Ferrol, e proporcionar á Institución Universitaria un permanente respaldo social sen fin lucrativo algún e



duración indefinida. Este fin levase a cabo, principalmente, a través do fomento das relacións universidade-empresa, en todas as súas facetas e ámbitos posibles, pero con especial incidencia na formación, emprego e innovación.

8º. A FUAC promove desde a súa creación, como unha das súas actuacións prioritarias consonte os seus fins fundacionais, a formación práctica de persoas tituladas e estudantes do sistema educativo galego a través dos seus programas de bolsas de formación, co fin último de conseguir un achegamento e a necesaria interactuación entre o mundo laboral e o sistema educativo, cos conseguintes beneficios para ambas as partes.

9º. As partes coinciden en salientar a necesidade de fomentar a formación profesional dual como xeito de incrementar o número de persoas que poidan obter un título de formación profesional, de facilitar a inserción laboral como consecuencia dun maior contacto coas empresas e de incrementar a vinculación e a corresponsabilidade coa formación profesional por parte do tecido empresarial, o que ha poder contribuír directamente a formar os/as futuros/as profesionais que necesita.

10º. De conformidade co disposto no artigo 4, liña d), do texto refundido da lei de contratos do sector público, son negocios e contratos excluídos do ámbito da devandita lei “os convenios de colaboración que, de conformidade coas normas específicas que os regulan, celebre a Administración con persoas físicas ou xurídicas suxeitas ao dereito privado, sempre que o seu obxecto non estea comprendido no dos contratos regulados nesta lei ou en normas administrativas especiais.” Polo que o presente convenio de colaboración está excluído do seu ámbito de aplicación.

11º. Neste marco, a Consellería de Cultura, Educación e Ordenación Universitaria e a FUAC resaltan a necesidade de uniren esforzos, mellorando o aproveitamento dos recursos e os medios dos que cada unha dispón, para daren un impulso á implantación da formación profesional dual no tecido empresarial galego, e promover a inserción laboral dos/as titulados/as mediante este programa de bolsas e acordan a subscrición dun convenio de colaboración para impulsar e apoiar as actuacións que se dirixan á posta en marcha dun réxime de bolsas de formación FUAC para titulados/as de formación profesional e un

régime de bolsas FUAC para estudantes nos proxectos de formación profesional dual nos que participen empresas e entidades empresariais e os centros docentes autorizados para impartir ciclos formativos de formación profesional dependentes da Consellería de Cultura, Educación e Ordenación Universitaria.

En consecuencia, estes organismos acordan subscribir este convenio, con base nas seguintes,

## CLÁUSULAS

### Obxecto do convenio

**Primeira.** O obxecto do presente convenio é establecer as condicións xerais polas que se rexerá a colaboración entre a Consellería de Cultura, Educación e Ordenación Universitaria e a FUAC para:

- a. A creación dun programa de bolsas de formación destinadas a titulados/as en formación profesional, en ensinanzas artísticas e nas deportivas do sistema educativo, para proporcionarlles unha maior formación e cualificación práctica e así facilitar a súa inserción profesional.
- b. O desenvolvemento de proxectos de formación profesional dual no sistema educativo, mediante a implantación e a aplicación dun réxime de bolsas FUAC nos proxectos de formación profesional dual que autorice a Administración educativa mediante un convenio con empresas colaboradoras.

**Programa de bolsas de formación para os/as titulados/as en formación profesional, en ensinanzas artísticas e en ensinanzas deportivas do sistema educativo.**

**Segunda.** O obxecto deste apartado do convenio é establecer as condicións xerais polas que se rexerá a colaboración entre a Consellería de Cultura, Educación e Ordenación Universitaria e a FUAC para apoiar as actividades da FUAC relacionadas co desenvolvemento de programas de formación práctica en empresas de persoas tituladas en formación profesional, ensinanzas artísticas e ensinanzas deportivas do sistema educativo de Galicia, así como a súa promoción e divulgación social.

**Terceira.** De acordo co obxectivo establecido na cláusula anterior e no contexto da colaboración que establece este convenio, a FUAC implantará e desenvolverá programas e actuacións específicos encamiñados a desenvolver o mecanismo que facilite a

realización, por parte das persoas tituladas en formación profesional, ensinanzas artísticas e ensinanzas deportivas, de prácticas de formación en empresas de calquera tamaño e sector de actividade.

En consecuencia, a Consellería de Cultura, Educación e Ordenación Universitaria e a FUAC colaborarán para proporcionarlles ás empresas que o soliciten os perfís profesionais demandados relativos a persoas tituladas en formación profesional, ensinanzas artísticas e ensinanzas deportivas, de xeito que leven a cabo un período de prácticas e formación na propia empresa en condición de bolseiros.

**Cuarta.** A FUAC comprométese a desenvolver o papel de interlocutora coas empresas, recollendo as súas solicitudes e establecendo as bases e os criterios para o programa de bolsas destinado ás persoas tituladas de formación profesional, ensinanzas artísticas e ensinanzas deportivas do sistema educativo de Galicia, que se adapten ao perfil demandado.

Igualmente obrígase a difundir publicamente entre as persoas tituladas a existencia de programas de bolsas de formación e prácticas.

**Quinta.** Este programa de bolsas de formación da FUAC é un mecanismo de natureza extralaboral pensado co fin de beneficiar directamente aos/ás propios/as bolseiros/as para que perfeccionen os seus coñecementos, permitindo así ampliar o seu campo de coñecementos. O programa de bolsas de formación da FUAC cumpre os requisitos previstos no artigo 1 do Real decreto 1493/2011, do 24 de outubro, polo que se regulan os termos e as condicións de inclusión no réxime xeral da Seguridade Social das persoas que participen en programas de formación, polo que a devandita norma resulta de aplicación.

**Sexta.** A Consellería de Cultura, Educación e Ordenación Universitaria e a FUAC, na medida das súas competencias, levarán as actuacións necesarias para que no Servizo Público de Emprego de Galicia se facilite información ás persoas demandantes de emprego que teñan a condición de tituladas en formación profesional, ensinanzas artísticas e ensinanzas deportivas sobre a existencia dos programas de formación da FUAC, e que se recolla, de ser o caso, o seu interese polo devandito programa.

**Proxectos de formación profesional dual no sistema educativo, mediante a implantación e a aplicación dun réxime de bolsas FUAC**

**Sétima.** O réxime de bolsas destinado aos proxectos de formación profesional dual é un mecanismo de natureza extralaboral, pensado co fin de beneficiar directamente as propias persoas bolseiras, para recibiren a formación necesaria para a obtención dun título de formación profesional de grao medio ou superior ou, de ser o caso, acreditación parcial acumulable. O programa de bolsas de formación de FUAC cumpre os requisitos previstos no artigo 1 do Real decreto 1493/2011, do 24 de outubro, polo que se regulan os termos e as condicións de inclusión no réxime xeral da Seguridade Social das persoas que participen en programas de formación, polo que a devandita norma resulta de aplicación.

**Oitava.** A implantación e a aplicación do réxime de bolsas, con suxeición ás condicións e ás características recollidas no presente convenio, terá lugar mediante a inclusión, no proxecto de formación profesional dual que se autorice e formalice entre a Consellería de Cultura, Educación e Ordenación Universitaria e a empresa colaboradora, da previsión de que o alumnado disporá dunha bolsa a través do réxime de bolsas da FUAC.

**Novena.** Para os efectos do disposto nas cláusulas anteriores, nos supostos en que as empresas que asinen convenios coa Consellería de Cultura, Educación e Ordenación Universitaria para colaborar en proxectos de formación profesional dual opten por incluír un réxime de bolsas para os estudantes aos que se refire o proxecto de formación, o devandito réxime de bolsas será o das bolsas de formación profesional de estudantes de FUAC. O réxime de bolsas estará suxeito ás seguintes especificidades:

- a. A empresa, en virtude da sinatura do convenio coa Consellería de Cultura, Educación e Ordenación Universitaria, adquirirá o estatus de entidade colaboradora do Programa de bolsas formación profesional dual (PBFPd). A administración educativa informará a FUAC das sinaturas de convenios con empresas para desenvolver proxectos de formación profesional dual no réxime de bolsas.
- b. Para a efectividade da bolsa, as empresas aboarán á FUAC en períodos mensuais con carácter irrevogable, salvo polas causas legalmente previstas no artigo 648 do Código civil, a cantidade económica estipulada no convenio asinado entre a empresa e a Consellería de Cultura, Educación e Ordenación Universitaria. Os ingresos

deberán facerse efectivos nun número de conta da que é titular a FUAC e do que será informada a empresa.

- c. Para a efectividade do réxime de bolsas, as empresas colaboradas e as persoas bolseiras deberán, en todo momento, cumprir os requisitos establecidos na normativa que regula os proxectos de formación profesional dual e nos convenios asinados entre empresa e Administración educativa, dos que se entregará copia a FUAC a fin de que, xunto cos informes do seguimento que no seu caso se efectúen, poida levar a cabo tanto a efectividade da bolsa coma o control do cumprimento do réxime da mesma.

**Décima.** A FUAC obrígase por este convenio á realización das accións obxecto do mesmo e a facer constar en calquera tipo de publicidade e información que realice ao respecto a participación e a colaboración da Consellería de Cultura, Educación e Ordenación Universitaria.

**Décimo primeira.** A subscrición do presente convenio non supón relación laboral contractual nin de calquera outro tipo entre os/as profesionais que vaian desenvolver as actividades e a Consellería de Cultura, Educación e Ordenación Universitaria, de tal xeito que non se lle pode esixir responsabilidade ningunha, nin directa nin subsidiaria, polos actos ou feitos acontecidos no seu desenvolvemento.

### **Seguimento do convenio**

**Décimo segunda.** Establecerase unha comisión de seguimento, control e supervisión, que se reunirá cando se considere oportuno por calquera das partes asinantes. Esta comisión estará constituída por:

- a. Presidente/a: o director xeral de Educación, Formación Profesional e Innovación educativa, ou persoa na que delegue.
- b. Vogais:
  - A subdirectora xeral de Formación Profesional.
  - O director xerente da FUAC.

A comisión ditará as súas propias normas internas de funcionamento e deberá reunirse sempre que sexa necesario para o bo fin da colaboración. Entre outras, á comisión corresponderanlle as seguintes funcións:





- a. Propor actuacións concretas de colaboración.
- b. Preparar as addendas ou os anexos de execución do presente convenio sobre as modalidades de colaboración recollidas nel.
- c. Realizar o seguimento das actuacións específicas que se leven a cabo, así como aclarar e decidir cantas dúbidas poidan xurdir na súa interpretación e execución.

De consideralo de interese para os obxectivos e o desenvolvemento do convenio, as partes asinantes poderán invitar ás súas reunións a representantes das ensinanzas de formación profesional de Galicia, pola súa condición de persoas máis próximas aos receptores finais dos programas e das accións que abrangue o convenio.

### **Protección de datos**

**Décimo terceira.** De conformidade co disposto na Lei orgánica 15/1999, do 13 de decembro, de protección de datos de carácter persoal, e co Real decreto 1720/2007 polo que se aproba o regulamento desenvolvemento da citada lei orgánica, o alumnado e a empresa que por razón das actividades formativas teñan acceso a datos de carácter persoal, non disporán dos mesmos con finalidade distinta á esixida polas accións formativas.

### **Vixencia e extinción do convenio**

**Décimo cuarta.** O convenio entrará en vigor na data da súa sinatura e terá unha vixencia de catro anos, podendo prorrogarse por acordo das partes mediante a addenda correspondente.

**Décimo quinta.** Este convenio extinguirase pola finalización do tempo convido e poderase resolver por calquera das partes, mediante denuncia dalgunha delas, que se lle deberá comunicar á outra cunha antelación mínima de quince días, baseada nalgunha das seguintes causas:

- a. Forza maior que imposibilite o desenvolvemento das actividades formativas programadas nos proxectos de formación dual do réxime de bolsas.
- b. Incumprimento das cláusulas establecidas neste convenio.
- c. Mutuo acordo entre a Consellería de Cultura, Educación e Ordenación Universitaria e a FUAC.

De todos os xeitos os programas de bolsas de formación para titulados/as e os proxectos de formación profesional dual iniciados, ao amparo deste convenio, deberán finalizarse.



### **Carácter administrativo do convenio**

**Décimo sexta.** Este convenio posúe carácter administrativo por razón do contido e das materias sobre as que versa, as cales, ao abeiro do disposto no artigo 4.1 e 2 do Real decreto lexislativo 3/2011, do 14 de novembro, polo que se aproba o texto refundido da Lei de contratos do sector público, o exclúen do seu ámbito de aplicación, sen prexuízo da aplicación dos principios desta para resolver as lagoas ou dúbidas que a súa aplicación suscite.

Dada a natureza administrativa deste instrumento xurídico, as controversias ou cuestións litixiosas que xurdisen na súa aplicación e non puidesen ser solucionadas no seo da comisión de seguimento serán resoltas pola xurisdición contencioso-administrativa.

Lido o presente convenio, atópano conforme e asínano no lugar e na data indicados.

**O conselleiro de Cultura, Educación  
e Ordenación Universitaria**

**O presidente da Fundación Universidade  
da Coruña (FUAC)**

**Jesús Vázquez Abad**

**Jose M<sup>a</sup> Barja Pérez**